



BERTAQWALAH kita kepada Allah Subhanahu Wata'ala dengan sebenar-benar taqwa iaitu dengan meningkatkan keimanan kepadanya. Sesungguhnya orang yang paling mulia di sisi Allah Subhanahu Wata'ala ialah orang yang paling bertaqwa. Mudah-mudahan kita menjadi insan yang sentiasa mengingati Allah Subhanahu Wata'ala, beroleh kejayaan dan keselamatan di dunia dan juga di akhirat.

Agama kita mengajar kita umatnya bagaimana cara mengurus pendapatan dan perbelanjaan dengan betul iaitu dengan bersederhana. Kerana itu, jika kita menghayati dan mengikuti ajaran agama dalam soal berbelanja dan cara mengurus pendapatan, sudah pasti kita tidak akan terjebak dalam belenggu bebanan hutang yang banyak. Firman Allah Subhanahu Wata'ala dalam Surah Al-Furqan, ayat 67 :

Tafsirnya : "Dan mereka yang apabila membelanjakan harta, mereka tidak berlebih-lebihan dan tidak juga bakhil kedekut dan (sebaliknya) perbelanjaan mereka itu adalah sederhana antara kedua-duanya".

Walaupun agama kita tidak melarang umatnya berhutang akan tetapi ia bukanlah suatu perkara yang digalakkan. Kerana itu, agama Islam menasihatkan umatnya agar menjauhkan diri daripada hutang kecuali

Kewajiban membayar hutang

kerana keadaan yang mendesak dan sangat memerlukan. Oleh itu, jika kita terpaksa juga berhutang, maka kita hendaklah berniat dan berazam untuk membayar hutang tersebut. Bukan sewenang-wenangnya berhutang, tetapi hendak membayarnya pula selalu bertangguh-tangguh dan adakalanya langsung tidak mahu membayar sehingga menyebabkan perkelahian dan permusuhan. Rasulullah Sallallahu Alaihi Wasallam ada mengajarkan doa supaya dilindungi dari hutang. Doa tersebut ialah :

Maksudnya : "Ya Allah sesungguhnya aku berlindung dengan-Mu dari dosa dan hutang".

Adalah menjadi kewajiban bagi orang yang berhutang untuk membayar hutangnya itu sebagaimana perjanjian yang telah dipersetujui antara orang yang memberi hutang dan orang yang berhutang. Kewajiban membayar hutang ini termasuklah juga bagi pembayaran bil-bil yang tertunggak seperti bil air, bil elektrik, bayaran perumahan, dan seumpamanya.

Akan tetapi tidak dinafikan terdapat juga sebahagian orang yang berhutang tidak dapat membayar hutangnya disebabkan sumber kewangan yang kurang mencukupi. Walau bagaimanapun, mereka hendaklah sentiasa berusaha dan mencari ikhtiar untuk menjelaskan semua hutang yang ada. Ini kerana, Allah Subhanahu Wata'ala akan memberi kemudahan dan pertolongan kepada orang-orang yang ingin melunaskan hutangnya. Daripada Abdullah bin Ja'far, Rasulullah Sallallahu Alaihi Wasallam bersabda :

Maksudnya : "Allah akan bersama (memberi pertolongan pada) orang yang berhutang (yang ingin melunasi hutangnya) sampai dia melunasi hutang tersebut selama hutang tersebut bukanlah sesuatu yang dilarang oleh Allah".

Ketahuilah, perbuatan memandang ringan kewajiban membayar hutang bukan sahaja akan menyusahkan si penghutang itu di dunia, bahkan akan mengeretnya kepada kerugian dan kesusahan di akhirat kelak apabila dia mati sebelum sempat

melunaskan hutang-hutangnya dan ahli-ahli warisnya pula tidak mahu bertanggungjawab untuk menyelesaikan hutang-hutang tersebut.

Sesungguhnya orang yang meninggal dunia dalam keadaan masih belum melunaskan hutangnya, pada hari kiamat kelak segala amal kebaikan dan kebajikannya akan diambil dan digunakan untuk melunaskan hutang-hutangnya. Seandainya belum juga mencukupi, maka segala dosa dan kesalahan yang dilakukan oleh orang yang memberi hutang itu pula dipindahkan kepada orang yang berhutang tersebut. Daripada Ibnu Amru Radiallahuana, Rasulullah Sallallahu Alaihi Wasallam bersabda :

Maksudnya : "Barang siapa yang mati dalam keadaan masih memiliki hutang satu dinar atau satu dirham, maka hutang tersebut akan dilunasi dengan amal kebajikannya (di hari kiamat nanti) kerana di sana (di akhirat) tidak ada lagi dinar dan dirham".

Terdapat adab-adab yang boleh kita ikuti agar tidak terhimpit dengan beban tanggungan hutang yang banyak. Antaranya :

Pertama : Hanya berhutang sekiranya benar-benar terpaksa bagi keperluan yang penting dan tidak dapat dielakkan.

Kedua : Mengelakkan daripada menambah hutang sebelum terlunas hutang-hutang yang terdahulu.

Ketiga : Sekiranya telah tiba tempoh pembayaran dan kita belum mampu juga untuk melunaskan hutang tersebut, maka hendaklah berbincang dengan elok untuk meminta penangguhan.

Keempat : Memberi maklumat kepada pemiutang dari semasa ke semasa dan memberi maklum balas, tidak mengelak apabila dihubungi, tidak melarikan diri dan sentiasa berlaku baik kepada pemiutang. Janganlah disebabkan belum mampu untuk membayar hutang, si pemiutang dilayan bagaikan musuh atau orang asing. Ini kerana terdapat segelintir orang yang lari daripada membayar hutang, bersembunyi, tidak dapat dihubungi, tidak dapat dikesan dan bersikap acuh tidak acuh sehingga

tidak menyebabkan si pemiutang pula yang terpaksa terburuk-buruk menagih hak mereka.

Kelima : Merancang perbelanjaan dengan lebih teliti dan mengutamakan keperluan-keperluan utama serta mengamalkan gaya hidup sederhana dan berbelanja dengan berhemah.

Keenam : Menjaga hubungan baik dengan pemiutang. Dalam masa yang sama pemiutang juga hendaklah berperasaan timbang rasa kepada yang berhutang yang benar-benar dalam kesulitan untuk melunaskan hutangnya.

Sebagai orang Islam, biarlah kita hidup dengan sifat *qanaah* iaitu hidup berpada-pada dan bersederhana dalam memenuhi keperluan hidup seharian. Elakkanlah diri kita daripada amalan suka berhutang, amalkanlah sikap bersederhana dalam berbelanja. Janganlah kita menurut kata hati dan hawa nafsu kerana berhutang itu memanglah mudah dan senang, akan tetapi membayarnya pula adalah amat berat dan sangat susah. Sama-samalah kita berdoa "Ya Allah, sesungguhnya aku berlindung kepadamu dari kedukaan dan kesudahan. Aku berlindung kepada-Mu dari sifat lemah dan malas. Aku berlindung kepada-Mu daripada sifat pengecut dan bakhil. Dan aku berlindung kepada-Mu dari beban hutang dan penindasan manusia". Amin Ya Rabbal Alamin.

Tafsirnya : "Dan jika kamu sedang musafir (lalu kamu berhutang atau memberi hutang yang bertempoh) sedang kamu tidak mendapati pencatat, maka hendaklah diadakan barang jaminan untuk dipegang (oleh orang yang memberi hutang). Jika sebahagian kamu mempercayai sebahagian yang lain hendaklah yang dipercayai itu menunaikan amanahnya (hutangnya) dan hendaklah dia bertaqwa kepada Allah tuhannya. Dan janganlah kamu (saksi-saksi) menyembunyikan perkara-perkara yang dipersaksikan itu dan sesiapa yang menyembunyikannya, maka sesungguhnya dia ialah orang yang berdosa hatinya. Dan Allah Maha Mengetahui apa yang kamu kerjakan". (Surah Al-Baqarah, ayat 283).

UNISSA terima kunjungan delegasi Aceh



UNIVERSITI Islam Sultan Sharif Ali (UNISSA) menerima kunjungan daripada delegasi Himpunan Ulama Dayah Aceh (HUDA), Indonesia.

Siaran Akhbar dan Foto : Universiti Islam Sultan Sharif Ali

BANDAR SERI BEGAWAN, Khamis, 30 Januari. - Universiti Islam Sultan Sharif Ali (UNISSA) baru-baru ini menerima kunjungan daripada delegasi Himpunan Ulama Dayah Aceh (HUDA), Indonesia.

Kunjungan delegasi diketuai

oleh Ketua Umum HUDA, Tgk H Muhammad Yusuf A Wahab dan diiringi oleh Penolong Setiausaha HUDA, Tgk Muhammad Rizuan Haji Ali serta seramai 11 orang tenaga pengajar.

Rombongan delegasi dialu-alukan oleh Pemangku Rektor

UNISSA, Dr. Haji Mohammed Hussain bin Pehin Penyurat Haji Ahmad dan seterusnya menerangkan perkembangan kemajuan yang dicapai oleh UNISSA serta program-program yang ditawarkan di UNISSA.

Dalam sesi dialog dengan para delegasi, pihak UNISSA membuka ruang kepada

warga antarabangsa yang ingin mengikuti program-program yang ditawarkan, termasuklah dari Aceh.

Tujuan delegasi membuat lawatan adalah kerana begitu teruja untuk menghantar pelajar Aceh ke UNISSA agar dapat mendalami lagi pemahaman akidah Ahli Sunnah Waljamaah dan Aliran Mazhab Al-Syafii

yang merupakan pegangan di Negara Brunei Darussalam.

HUDA setakat ini mempunyai sistem pendidikan tradisional yang menumpukan pengajian Islam berpandukan kitab-kitab Turath dan sedang berusaha untuk memberikan pendidikan yang murni dalam menangani isu-isu global, terutama masalah penyelesaian akidah.